



Comde'

1995-

LL 19202



Case

F

39

326

1614 mar



# RESPONSE

DE LA ROYNE REGEN-  
te, Mere du Roy, à la lettre escrite à sa  
Majesté, par Monseigneur le Prince de  
Condé, le 19. de Feburier, 1614.

**M**On Nepueu, vostre lettre escrite à Maisieres, le dix-  
neufiesme de ce mois, m'a esté présentée le vingt vn-  
iesme. Elle contient plusieurs chefs, auxquels ie voulois  
attendre à respondre particulièrement, lors que les Estats  
generaux du Royaume seroyent assemblez, puis que le  
Roy, Monsieur mon fils & moy auions ja arresté, par l'ad-  
uis des Princes & Officiers de la Couronne, & autres  
principaux Conseillers du Roy, mondict Sieur & fils qui  
sont aupres de nous, d'en faire la conuocation, dont nous  
auions donné aduis par les Provinces deuant la reception  
de vostredicte lettre, comme vous eussiez appris de mon  
Cousin le Duc de Ventadour, & du Sieur de Boissize, que  
i'auois despechez vers vous, si vous ne fussiez partiz de vo-  
stre maison de Chasteauroux, pour passer en Champagne,  
côme vous auez faict (sans nous en donner aduis) au mē-  
me temps qu'ils s'acheminoyent à vous. Où si depuis vous  
leur eussiez mandé approuuer qu'ils fussent allez où vous  
estes, comme ils s'y sont offerts par leurs lettres, qui vous  
ont esté portees par homme expres. I'ay eu à plaisir de co-  
gnoistre, par la lecture de vostredicte lettre, que vous ap-  
prouuez ladicte assemblee. Car c'est vn bon remede pour  
pouruoir aux desordres que vous dites auoir cours de-  
dans le Royaume: C'est aussi celuy qui a tousiours esté  
plus estimé, & desiré de moy, & duquel ie faisois bien estat  
d'vser à l'entree de la majorité du Roy, mondict sieur &



fils, pour luy représenter en vne si notable compagnie, le  
 passé de ma regence, L'informer du present, & mieux rei-  
 gler toutes choses pour l'aduenir, que ie n'ay peu faire, à  
 mon grand regret, durant mon administration. Mais  
 comme depuis, vous auez enuoyé vne coppie de ladicte  
 lettre à Messieurs de la Cour de Parlement de ceste ville,  
 I'ay creu que vous la diuulgueriez encore par toutes les  
 autres compagnies & Prouinces du Royaume, pour en  
 mesme temps, descrier par tout, comme il semble, que  
 vous pretendez faire icy, la direction, & conduicte des  
 affaires publiques aupres de moy, à mon desaduantage:  
 Car les plaintes que vous faictes, des desordres que  
 vous attribuez à ceux qui seruent le Roy aupres de moy,  
 s'adressent plus à moy qu'à eux: C'est vn artifice dont  
 l'on vse à poste, pour donner aux subiects du Roy vne  
 mauuaise odeur, & impression de mes actions. C'est  
 pourquoy i'ay bien voulu, en attendant la tenue des-  
 dits Estats generaux, que i'auanceray tant que ie pourray,  
 vous faire scauoir par a luanee, ce qui est contenu en la  
 presente. Je commenceray doncques par vous dire, mon  
 Nepueu, que vous, & toute la France, estes obligez, quoy  
 que vous puissiez dire, & publier au contraire, de reco-  
 gnoistre & confesser que le Royaume a par la singuliere  
 grace de Dieu, & à l'assistance que i'ay receue des gens de  
 bien, iouy en ma Regence, contre l'opinion commune  
 d'vn repos general, & plus entier, que nous n'eussions osé  
 esperer, apres auoir perdu le feu Roy, mon Seigneur, que  
 Dieu absolue (la seule presence duquel contenoit toutes  
 sortes de personnes en deuoir & obeissance) dont ie ne  
 puis louer assez sa bonté & prouidence diuine, & les bons  
 François, de toutes qualitez, qui ont en cela, fidelement  
 seruy le Roy, mondit Sieur & fils, au grád besoin que i'en

ay eu: Car chacun a sceu, & veu quelles ont esté mes pe-  
nes, mes combats, & mes cōtinuels trauaux, pour main-  
tenir la tranquillité publique, qui est encores maintenant  
enuiee & trop rudement, & ouuertement assaillie par  
ceux qui deuroyent moins le faire; Ils ont commencé dès  
le Sacre du Roy, mondict sieur & fils, ont depuis cōtinué  
comme ils font encores, par l'ordre & direction d'un mes-  
me Conseil: l'aduoué librement auoir quelques fois eu re-  
cours à des moyens peu conuenables à la dignité du Roy  
mondit sieur & fils, pour contenir & retenir en deuoir les  
auteurs de telles trauerſes: Mais ie l'ay faict pour euitier  
pis. Ce qui a esté souuent aussi mal recogneu, qu'il est à  
present mal interpreté par ceux mesmes qui en ont pro-  
fité. C'est la cause principale des despées que vous nom-  
mez à present prodigalitez; que la necessité du Royaume  
a extorquées de moy, contre ma propre volonté, & qui  
n'eussent eu lieu, si vous m'eussiez aussi assiduellement  
fortifiée de vostre assistance, que ie l'ay désiré, & vous ay  
donné occasion de faire, par l'entiere & honorable, part  
que vous auez rousiours eüe en la conduicte des affaires,  
par preference à toutes autres, comme il est deub à vostre  
qualité: Mais ie ne puis que ie ne me pleigne à vous, de-  
quoy vous auez laissé couler & passer quatre anneés de  
ma Regēce, sans m'auoir aduertie des maluerſatiōs sur les-  
quelles vous fondez vostre mescontentement. Car si vous  
me les eussiez descouvertes, i'y eusse apporté l'ordre neces-  
saire pour le bien du Royaume, auquel vous auez notable  
interest: Tellement qu'il semble que l'on ayt voulu expres  
faire un amas de telles plaintes (qui sont toutes fois autant  
imaginaires que peu veritables) pour dōner preterte aux  
factions, & mouuemens qui menacēt le Royaume de des-  
ſolation, ou de dissipation, au lieu d'une reformation que



vous dites rechercher. A quoy ie voy, avec desplaisir, que l'on vous engage contre vostre volôté: Car vous avez vn interest si remarquable, de conseruer ceste Couronne entiere & en felicité, que ie neveux point douter que vostre intention ne tende à toute autre chose: Mais pour y paruenir plus honorablement & vtilement, vous ne deuiez vous esloigner de moy. ny commencer parformer vne societé qui en engendrera d'autres: Car toutes diuisions & partialitez en vn Royaume sont de tres dangereuse conséquence, Tant s'en fault que i'en aye approuuée vne seule, que ie les ay toutes detestées principalement si tost que ie me suis apperceue que l'on vouloit s'en seruir, plus pour aduentager les particuliers, que pour bien faire au seruice du Roy: Au contraire i'ay tousiours desiré, comme ie fais encores de moyenner de tout mon pouuoir, vne bonne intelligence entre tous les Princes, Officiers de la Couronne, & les autres Seigneurs du Royaume, Mais i'y ay tousiours esté trauersée, & empeschée par les mêmes inuentions & artifices de ceux qui forment encores à presēt celle qui se presente, Et toutesfois ils osent eucore imputer aux conleils que i'ay suyui, les factions que ie condemne, dequoy i'ay souuent faict plainte à ceux que i'ay estimez y pouuoir apporter quelque remede: Si i'ay commandé l'observation exacte des Edicts faicts par le feu Roy, pour asseurer la paix du Royaume, ainsi que i'ay souuent faict, & reiteré avec grand soin, affection & sincerité, L'on a publié que ie faisois tels commandemens si precis, expres pour mieux surprendre ceux de la Religion pretendue reformée, qui s'y endormiroient, & s'est on seruy, pour les ombrager dauantage, des alliances que nous auons traictées du costé d'Espagne, comme si elles estoient basties expres contr'eux, & leur a on aussi celé ou



5  
desguisé à mesme fin celle que nous traiçons à present en Angleterre, par vostre aduis, de laquelle mon Cousin le Duc de Bouillon a esté le principal entremetteur. D'ailleurs, si quelques fois i'ay vſé d'indulgence a l'endroit d'aucuns de ladite Religion, apres auoir cōmis quelque excez contre la iustice, la raison, & lesdits Edicts, ils ont blasmé ma tolerance & patience, l'ont descritee & interpretée à mauuaise fin, Et toutesfois il est certain, si vous auez esté aupres de moy quand tels accidens sont arriuez n'auoir en tels cas, ny autres qui ont concerné le public, rien ordonné à vostre desceu. Telles personnes eussent peut estre desiré que i'eusse vſé de plus grande seuerité en telles rencontres, tant par vengeance particuliere, que pour engendrer noie, ennuyez de la durée de la concorde & paix du Royaume. Que n'a-il esté tenté & inuété pour exciter des mescōtentemens, former des partialitez, & factions, emouuoir les peuples à sedition par diuers moyes par gens impatiens de voir croistre le Roy, avec son aage, en iugement, courage, & en la cognoissance du bien, & du mal qu'il reçoit de ses seruiteurs & subiects: Tels officiers ont esté faicts curieusement, pour, en trauersant la conduite des affaires publiques, establir celles des particuliers. Et tout ainsi que i'ay trauaillé sincerement à maintenir la paix du Royaume, en failant exactement obseruer & executer lesdits Edicts: Je n'ay pas esté moins soigneuse & diligente à conseruer les amitez des alliez & confederez de la Courōne, tellemēt que i'en ay eu plustost accru que diminué le nōbre: Vetrablemēt i'ay preferé ladite alliāce d'Espagne à celle de Sauoye, mais ie n'ay rien faict en cela que le feu Roy Monseigneur n'eust faict lors que Dom Pedro de Toledo vint uers luy de la part du Roy d'Espagne, s'il luy en eust faict l'ouuerture, comme il s'y atten-

doit. Depuis ie m'y suis conduite entierement par l'aduis  
 de feu mon cousin le Comte de Soissons qui estoit aupres  
 du Roy quand la premiere proposition en fut faicte, la-  
 quelle vous fust communiquée par moy & par ledit Côte  
 à vostre retour de Guienne, & fust deslors approuvée  
 de vous comme de luy, & de tous ceux qui en eurent co-  
 gnoissance, comme vtile, bien proportionnée à l'aage & à  
 la grandeur du Roy: Et puis affermer n'auoir esté poussée  
 à ceste preference par defect d'affection & bonne volon-  
 té enuers mon frere le Duc de Sauoye, & sa maison, ny à  
 autres fins que de la consideration du merite d'une telle  
 alliance, & de l'affermissement de la paix entre ces deux  
 Roys, vtile à la Chrestienté, & plus necessaire à l'Estat pré-  
 sent des affaires du Royaume qu'en autre saison. Dequoy  
 ledit Duc de Bouillon fust chargé d'esclaircir le Roy de la  
 grande Bretagne, où le Roy, & moy l'enuoyames exprés  
 pour faire cet office, qui fut rendu semblable en mesme  
 temps aux autres Princes, Potentats, & alliez de ceste  
 Couronne, qui ont tous monstré les auoir receuz en bon-  
 ne part: Je diray dauantage, que les motifs du Conseil qui  
 en fut lors pris, n'ont esté moins considerables pour ledit  
 Duc de Sauoye, & ses Estats, que pour la France, Vous en  
 sçauiez les raisons cōme moy, mais tels blasment à present  
 lesdits conseils & mariages, qui ne feroient, peut estre,  
 conscience de se preualoir au desaduantage du Roy, mon-  
 dit sieur, & si's, & du repos de la France, d'une mauuaise  
 intelligence entre ces deux Roys. C'est pourquoy ils v-  
 sent encores à present de toutes sortes d'artifices, & de di-  
 ligences pour en retarder l'execution, en intention de les  
 rompre dutout, s'ils le peuvent faire, Mais i'espere que  
 nous sçaurons bien y remedier, avec l'ayde de Dieu, qui  
 favorisera, s'il luy plaist, nos sincerés intentions, qui n'ont



autre but que de procurer le bien du Royaume, avec le  
 contentement particulier du Roy & le bien de ma fille  
 aînée, tout ainti que i'espere faire pour la seconde du co-  
 sté d'Angleterre, dequoy vous ne faites mention par vo-  
 stredite lettre, cela nuirait aussi au dessein de ceux qui vo-  
 conseillent: l'espere de sortir amiablement à l'honneur du  
 Roy, & au bien & contentement de ses subiects des diffé-  
 rens de Nauarre, mesmes deuant que nous passions outre  
 ausdits mariages, sinon i'auray tel soin de conseruer en ce-  
 ste occasion, les droicts, les limites, & la reputation de la  
 France, que ceux qui nous accusent de n'en auoir le soin  
 que i'en dois auoir, auront occasion de s'en dédire, & de  
 retrancher de leurs plaintes celles qu'ils fondent sur ce su-  
 jet: Mais quoy? Ils voudroient desia nous voir aux prises,  
 & aux armes avec le Roy d'Espagne, pour s'en preualoir  
 en leurs imaginations: Tant s'en faut aussi que l'on aye  
 sujet de se plaindre de l'assistance du Roy, mondit sieur,  
 & fils, & de la miene, aux affaires du Montferrat, que i'at-  
 tendois des louanges & des remerciemens du soin que  
 i'en ay eu. Car il est notoire à tous, si mon Nepueu le Car-  
 dinal Duc de Mantouë (que i'affectionne beaucoup, avec  
 toute sa maison, à cause de son affection enuers la France,  
 & de nostre proximité) iouist à present de quelque allege-  
 ment en ses affaires, il doit estre attribué au secons, & aux  
 offices de vraye amitié que le Roy mondit sieur & fils, &  
 moy, luy auons departis en ceste necessité, lesquels nous  
 aurons tousiours à plaisir de luy continuer, autant que les  
 affaires du Royaume nous le permettront. car ie suis obli-  
 gée, comme vous sçauiez, de preferer celle-cy à toutes au-  
 tres, dequoy si i'vsois autrement, vous me blasmeriez avec  
 raison le premier: Comme ie ne puis faire assez ceux qui  
 reprennent, ou condamnent les deuoirs qui ont esté faits



pour faire considerer, & poiser comme il couuient, les raisons qui importent à la France sur la nouuelle poursuite des Venitiens, pour le renouvellement de leur alliance avec les Lignes Grises, dignement representées par l'Ambassadeur du roy, qui reside ausdites Lignes, deuant que d'y engager le nom & la reputation du Roy: Considerez ie vous prie, à quels termes de mesconnoissance enuers le bien public du Royaume, les passions priuées deluoyent ceux qui blasment nostre conduicte en ce faict, Car ils veulent que ie passe par dessus toutes sortes de raisons, & considerations; quelques importantes qu'elles soient au Roy, & au Royaume, pour suivre leurs opinions, soit pour flatter ladite republique, ou pour auoir sujet de fomentier & accroistre dauantage la desiance desdites alliances d'Espagne, comme si la seule consideration des interests d'Espagne, nous retenoit de contenter ladicte republique, & fauoriser ladicte alliance, chose qui est tres-esloignée de la verité, Mais il ne faut que lire les depesches de nostre Ambassadeur, & se ressouuenir des accidents suruenuz à ceste nation Grisonne, apres la premiere ligue de Venise, pour condamner la plainte que l'on fait de ma conduite en cecy. Ladite premiere ligue fust veritablement fauorisée par le feu Roy, mais il s'en repentit assez, quand il vit qu'elle preiudicioit à la sienne (qui couste cher à la France,) & auoir plongé ceste nation en des confusions & calamitez tresgrandes, dont la memoire leur est tous les iours rafraischie quand ils iettent les yeux sur le fort de Fuentes, basti à la frontiere de leur pays, apres que ladite ligue de Venise fust faicte, & à l'occasion d'icelle. Et neantmoins comme le Roy, mondit sieur & fils, & moy, desirons grandement fauoriser ladite republique à l'imitation du feu Roy, & de ses predecesseurs

seurs. Nous auons ordonné que les capitularions de leur premiere alliance, soyent veuz pour retrancher & reformer celles qui peuuent nuire & affoiblir celle de France. Dequoy l'Ambassadeur de la seigneurie doit conferer avec ceux du Conseil du Roy. Ceste procedure ne peult estre iustement reprise & blasmée, Mon Nepueu, que par ceux qui cherchent querelle, & preferent leurs passios au bien de la Frâce Mais qu'y a il que l'on n'inuente, & que l'on ne publie pour descrier ma regence, & les seruiteurs du Roy qui trauaillent iournellement auprès de moy, pour s'acquitter fidellement de leurs charges. Nous voyons claiement que l'on s'adresse à eux, pour en espargnant mon nom, en papier, faire tomber sur moy, par effect, les reproches, d'où l'on les charge. Tant y a, que personne ne peut nier que le Royaume ne iouisse à present d'une felicité plus digne d'admiration, & partant d'honneur, & de louange pour ceux qui seruent, que d'aucun reproche: Ce sont gens vieillies dedans les affaires publiques, & les charges qu'ils exercent: Si le soin qu'ils y employent, avec beaucoup de fidelité, d'euie, & de labeur, doit estre baptisé du tiltre d'ambition, & conuoitise de gouverner, l'auoue qu'ils sont coupables: En tout cas, mon Nepueu, les fautes sont personnelles, Si aucund'eux s'est tant oublié que de manquer au deuoir de sa charge, & mesmes à vous seruir, i'entens plustost le condamner que de l'excuser, Mais ie scay qu'ils en ont usé autrement, & que vous auez plus de sujet de vous louer de l'honneur qu'ils vous ont tousiours rendu, & du seruice qu'ils vous ont fait auprès du Roy, & de moy, & au public, que vous n'auiez de les tenir pour tels que vo<sup>us</sup> les dépeignez, & neantmoins ie veux me plaindre à vous, de vous estre par trop desfié de vostre creance, & puissance



enuers moy, & de mon affect: & enuers vous, d'auoir lais-  
 sé passer tant de temps depuis ma Regence, sans m'auoir  
 delcouuert leurs deportemēs, si vous les auez recogneuz  
 preiudiciables au public. Car i'y eusse pourueu par vostre  
 bon aduis, & me promets tant de la reuerence qu'ils por-  
 tent à mes volonteiz, & à vostre personne, que seulement  
 pour nous complaire, & se delcharger du fardeau qu'ils  
 supportent, & contenter le public, ils auroyēt librement  
 eux mesmes remis leurs charges en ma dispositiō, au pre-  
 mier signe qu'ils en eussent receu de moy, cōme ils m'ōt  
 particulierement & publiquemēt déclaré sur vostre dite  
 plainte, qu'ils sont encores prests à faire à la premiere se-  
 monce qui leur en sera faite de ma part: Pareillement ma  
 condition seroit bien dure, & mon pouuoir restraint, s'il  
 ne m'estoit possible de remunerer de biens, & d'hōneur,  
 (sans faire preiudice au Roy, n'y au public) vne lōgue ser-  
 uitude accompagnée d'une fidelité esprouuée? Voudriez  
 vous estre reduit à tels termes pour ceux qui vous seruēt?  
 Vous nous auez bien fait cognoistre que vos preten-  
 tions, & intentions sont bien esloignées de ceste restrin-  
 ction, laquelle aussi doit estre iugée de vous peu equira-  
 ble pour les autres: Semblablement ie recognois que le  
 Roy eust esté mieux seruy, si nous eussions reiglē vn Con-  
 seil pour les affaires d'Estat, composé seulement de vous  
 & des autres Princes, avec les Officiers de la Couronne  
 Mais qui a plus desiré cela, & qui y a plus trauaillé que  
 moy, à quoy veritablemēt i'ay esté mal assistée de vo<sup>9</sup>, Et  
 toutes fois maintenant vous vous seruez de ce sujet, & de  
 la cōfusion dudit Conseil, pour descrier les seruiteurs du  
 Roy, & le gouuernement: Seroit-ce pas vn grand hon-  
 neur, & aduantage, & vne pareille delcharge pour ceux  
 qui les manient, à cause de leurs Offices, si les depesches à



mesure qu'elles sont receuës, & que les respōces sont ordonnées, & dressees, elles estoient leuës en vn cōseil réglé, & compoté de personnes de telle qualité, Pour le moins leur labeur, & leur diligence, avec leur iustifiance, seroyent mieux cogneuës, & toutes choses seroyent veritablemēt mieux ordonnées: Vous deuez vous souuenir, que voyant que ie ne pouuois paruenir à la reduction, & reformation dudit Conseil, par faute d'assistance, j'auois trouué bon que ceux qui ont les charges des despesches, & des fināces, vous veissent par fois en vostre maison, & receussent vos aduis sur icelles, pour les me représenter pour vous tesmoigner l'estime que ie fais de vo<sup>r</sup>, & ma cōfiance en toutes choses Mais vous vous estes pluſtost lassé de cet ordre que vous n'uez fait paroistre d'e desirer la cōtinuatiō: Outre cela, on a voulu vous faire trouuer mauuaise mon entrée au Conseil des affaires des provinces, comme si ma presēce debuoit y estre incomparable avec la vostre, & en quelque sorte retrancher le respect qui vous est deub, chose veritablement qui seroit aduenü contre mon intention: L'auouë bien d'estre tres-ialouse du biē des affaires du Roy Mais de qui dois-je esperer d'estre mieux secōdée en cela que de vous, estāt ce que vous estes? Or mon Nepueu, pour bien faire au public, vo<sup>r</sup> deuez demeurer auprès du Roy, & de moy, vostre qualité de premier Prince du sang vous eust donné toute creance & autorité pour estre oüy, & creu, sans autre assistance que de la iustice, & de la verité de vostre remonſtrance. Vous eussiez cogneu & esprouvé par vrayes effects, que mon affection enuers le public surmonte de beaucoup celle que ie rends aux particuliers de toutes qualitez. Vous m'eussiez trouuée tres-desireule de la conuocation, & du remede desdicts Estats generaux

pour estre tons en la forme anciēne, en laquelle chacun trouuera la seureté & liberté qu'il conuient, pour y cō-  
 paroistre, & y bien seruir le Roy, & le public, souz la pro-  
 tection de son autorité souueraine, & de la iustice, telle  
 qu'elle doit estre arēduē, & desirée de tous. Mais prenez  
 garde que souz pretexte de la demāde, que l'ō vous fait  
 faire en termes generaux de rēdre lesdicts Estats, seurs &  
 libres, l'ō ne minute & proiecte desia des difficultez pour  
 éluder & aneantir ladite assemblée, & en auorter le fruit  
 deuant la naissance au preiudice du public, contre vostre  
 attente, & vostre proposition. Ceux qui auroyent ce des-  
 sein estimeroyent neantmoins de n'auoir peu gagné, en  
 faueur de leur party, d'auoir par anticipation semé dedās  
 les esprits des hōmes, l'esperance de ladite assemblée, fon-  
 dée sur ladiēte reformatiō, quand bien elle deuroit apres  
 tourner en fumée, pour rēuerser sur les autres, vn mesco-  
 tentement general de l'interruptiō d'icelle, duquel ils se-  
 royent neantmoins seuls caule : Ce que vous m'avez  
 mandé auoir esté deliberé icy, d'arrester la persōne dudit  
 Duc de Bouillon ; me donne ce soupçon, Car cōme tel  
 aduis est imaginaire, faux, & plein d'artifice, procedant  
 d'vne profonde malice, ie ne puis que ie n'apprehende  
 dès à present la rencōtre à l'aduenir, de séblables ruzes,  
 & inuentions, mesmes lors qu'il faudra donner étrée à la  
 dite assemblée d'Estats, Partant vous y aduiserez, & y  
 pouruoierez de bonne heure : Mais ie ne puis bonnemēt  
 croire que mon Cousin le Duc de Longueuille ayt rap-  
 porté que ie luy aye refusé d'aller en son gouuernement  
 bien l'auoy. Je moy mesme prié d'attendre quelques  
 iours à partir, pour resoudre avec luy les Estats des garni-  
 sons, & fortificatiōs des places dudit pays, en la forme ac-  
 coustumee, à quoy il eust trouuē à redire, & à se plaindre



si i'y eusse touché sans luy. De sorte que i'ay bien plus grā  
 de & iuste cause de me douloir de luy, dequoy m'ayant,  
 apres diuerſes instances, faict asseurer qu'il me donneroit  
 ce delay, il s'est derobé de nous à heure indeue, pour tes-  
 moigner à tout le monde la méfiance qu'il a de ma foy,  
 laquelle n'a toutesfois encores defaillly à personne viuāte,  
 graces à Dieu: Ce proceder fut cause, que m'ayāt esté rap-  
 porté que le Duc de Vendosme auoit longuement con-  
 feré avec ledict Duc de Longueuille, le mesme iour de sō  
 depart, ioint les diuers & frequents aduis qui m'estoyent  
 donnez, des preparatifs qu'il faisoit, pour à son imitatiō,  
 se desrober, le pris conseil, meüe du soin que veux auoir  
 de sa fortune, & de sa repuration, pour le respect que  
 ie dois, & veux rendre toute ma vie à la memoire du feu  
 Roy mondict Seigneur) de le faire retenir en la chambre  
 dedans le Louure, non à autre fin, que pour le garentir  
 d'une desobeissance, en laquelle ie le voyois prest à se pre-  
 cipiter, ce qu'il a mal recogneu, & veritablement sa faute  
 & mesconnoissance en cela, est plus blasmable en luy  
 qu'en vn autre: Vous en scauez les raisons, que vous auez  
 quelques fois employces pour l'accuser & le reprendre:  
 Mais c'estoit lors que ledict Duc auoit recours à d'autres  
 qu'à vous, pour estre supporté en ses ieunesses: Quant à la  
 Citadelle de Bourg, comme elle auoit esté bastie par feu  
 Monsieur de Sauoye, expres pour nuire à la France, elle a  
 esté rasée depuis, pour en asseurer la conseruation, L'ar-  
 gent qui a esté employé pour recompencer les seruices &  
 les merites du sieur de Boisse, qui y commandoit, n'in-  
 commodera point le Roy, mais plustost soulagera ses fi-  
 nances: Car ce n'est qu'une auance qui sera bien tost re-  
 compensée par l'espargne, de la garnison qui y seruoit, la-  
 quelle montoit par année beaucoup, de façon que ce



Conseil qui a esté approuué de plusieurs, sera vtile à la France: Tout ainsi que l'argent employé pour retirer le Chasteau d'Amboise des mains de celuy qui le gardoit, le sera aux villes assises sur la riuere de Loire, qui ont receu avec le pays, de grandes incommoditez durant la guerre, par la garnison qui y estoit, C'à esté dōcques pour mettre ledit pays en seureté, tirer de crainte des habitans d'iceluy que ladite recompense a esté donnée: Mon Nepueu, il est facile de decrier les actions de ceux qui manient les affaires publiques, le nombre des mal contens, & enuieux du bien d'autrui est grand, le desit de ceux qui s'ennuyent du repos n'est pas moindre: Et cōbien que depuis le trespas du feu Roy i'aye fauorisé l'ordre Ecclesiastique, celuy de la Noblesse, & fait soulager le peuple tant qu'il m'a esté possible, Toutesfois il semble par vostre dite lettre, que vous pretendez leur faire croire qu'ils ont esté & sont mal traittez, si cōtre mō esperance, & la raison, aucūs d'eux se laisser aller à telles inductions & persuasiōs, ils éprouuerōt biē tost apres par experiēce & par effects, qu'ils aurōt empiré leur condition, l'ay en toutes choses suiuy les traces du feu Roy mondict Seigneur en leur endroict, pour leur bien faire: l'ay distribué des graces parmy les deux prezniers Estats, avec soin & iugement, bien marrie de ne les auoir peu traicter mieux. Tant y a que les gēs d'Eglise ont exercé leurs fonctions, & iouy de leurs benefices en toute liberté & seureté. Plus grand nombre de Gentils-hōmes de qualité, dedans les Prouinces, ont esté gratifiez & fauorisez par moy. que du temps du feu Roy: Plus de cōpagnies de gendarmes entretenues: Quant à la vente & charté des offices, & des charges de la maison du Roy & des Prouinces, elle n'a esté introduicte de mon temps, ie recognois & ressens les maux qui en procedent. C'est

pourquoy i'ay recherché & téré les môyens de retrâcher  
& faire cesser la cause principale desdicts excez; Aucunes  
compagnies souueraines s'y sont opposees, qui sont d'ail-  
leurs pleines d'affection & de zele au bien public, Leurs  
raisons qui ont esté balancées au poids de l'interest parti-  
culier, ont pour ceste fois & en ceste occasion esté ap-  
prouuees, non de ma volonté mais par necessité. I'espere  
que nous pouruoirons à ce desordre, qui n'est des moins  
dommageables à l'estat, par l'aduis & avec l'ayde desdicts  
Estats generaux: Je ne diray rien des autres, Car ie n'en ay  
cognoissance, que par la plainte generale que vous en  
faictes: Mais ie scay bien que plus de personnes de tous  
estats ont beaucoup plus de subiect de se louer de leur  
condition presente, que ne voudroyer ceux qui les veulent  
rêdre mal contents par dessein & par force: Plusieurs se la-  
mentent & font bruiet de certaines commissions extraor-  
dinaires, & des impositions du sel, qui scauent bien que  
lesdictes impositions ont esté moderees depuis ma regence,  
& la plus grande partie desdictes cōmissions, reuoquees:  
Ils forment telles plaintes, & les iettent aux veux d'un  
chacun, plus pour les esblouyr & acquerir creance, que  
pour soin & intèrion qu'ils ayent de les en soulager. C'est  
pour fortifier leurs cabales, & toutesfois i'espere que les  
plus sages se garderont bien de chopper contre ceste pier-  
re, la memoire des playes, & des miseres & calamitez  
passees, prouenues des guerres ciuiles, est encores trop  
fraische, & viue dedans les cœurs & les biens d'un chacū:  
En tout cas, ie ne doute point que ceux qui se laisseront  
surprendre aux esperances d'une pretendue reformation  
& d'un soulagement public, par telles voyes ne s'en re-  
pentent bien tost. Les Ecclesiastiques cognoistront, par la  
suite de semblable amorces, qu'elles ne sont proposees



que pour auancer la ruine & desolation de leur ordre, a-  
 uec la Religion Catholique: Mais surquoy est fondée vo-  
 stre plainte, qui regarde la Sorbonne? L'on a semé à poste  
 dedans ce College venerable, la discorde pour former vn  
 schisme, non seulement en ceste compagnie, mais en tou-  
 te l'Eglise Catholique de ce Royaume: I'y ay opposé &  
 employé l'auctorité du Roy & la mienne, non pour nour-  
 rir leur diuision, mais par bonnes remonstrances & ex-  
 hortations, la composer & en empescher le cours. qui a-  
 il a redite, & reprendre en ceste procedure, autres ne peu-  
 uent la trouuer mauuaise, que ceux qui pretendent profi-  
 ter de ladicte diuision, comme trop souuent ils ont faict  
 de celles qu'ils ont introduictes & espandues par tout,  
 où ils ont esté escoutez. Au contraire d'eux, i'ay soigneu-  
 sement combattu & trauaillé en tous lieux pour composer  
 lesdictes diuisions, à mesure qu'elles sont venues à ma  
 cognoissance, & scay que ceux qui nous accusent de les  
 auoir entretenues, sont eux qui les ont formées, & en for-  
 gent encôres de nouvelles iournellement, autant parmy  
 les subiects du Roy, qui font profession de la Religion  
 pretendue reformée (que l'on m'a iniustement attribuée)  
 qu'à l'endroit des Catholiques, sans en cela espargner les  
 Princes & les grands du Royaume, en leurs propres mai-  
 sons & familles, dequoy vous & ceux qui vous assistent  
 ne demeurerez long temps sans vous ressentir vous mes-  
 mes & les autres aussi. Mais ce sera apres que vous serez  
 si engagez en leurs conseils, que vous ne pourrez plus  
 vous en retirer & desuelopper qu'à leur mercy & discre-  
 tion. Si ie pouuois vo' représenter par vne lettre les recorts  
 & presages sur cela du feu Roy, mondict Seigneur, ie les  
 vous exposerois volontiers, tant i'apprehende pour vous  
 & les autres Princes qui sont pres de vous & pour le pu-  
 blic,



blic, les disgraces & malheurs qui sont inévitables en la poursuite du dessein auquel on vous a embarqué: Vous protestez, mon Nepueu, de vouloir proceder en celle de la susdicte reformation par moyens legitimes, non & par armes: Je veux croire vostre intention estre telle, mais prenez garde que l'on ne vous engage à pis faire, & sur tout à bastir vn party dedans le Royaume qui sans la permission de l'autorité souueraine ne peut estre legitime, si faire ce-la n'est faire la guerre ouvertement, c'est forcer le Roy de s'y opposer par toutes voyes, c'est sonner la trompette pour les perturbateurs du repos public, & introduire, & commencer vne espece de guerre, pire que celle des armes, & partant au lieu de bien faire à l'Estat, en aduancer la desolatiō: J'espere tant de la loyauté de ceste genereuse Noblesse, qui a tousiours exposé & respendu liberalement son sang pour defendre la personne de son Roy & son autorité souueraine, qu'elle persueuera fidellement en ce deuoir, nonobstant les artifices & desguisemens dōt l'on vse pour la seduire: Je nourriray & esleueray aussi mon fils en la recognoissance & remuneration du merite & des seruices d'icelle, à l'imitation du feu Roy son pere, lequel assisté de ladicte Noblesse, coniointe à la faueur du Ciel, & secondée de sa propre vertu, a sauué le vaisseau de la Frâce du naufrage qu'il a couru par l'etresuite des guerres ciuiles. Les villes ne detesterōt ny fuirōt pas moins les auteurs des causes & partialitez qui engendreront seblables effectz, car ils ne peuuent estre si couverts en leurs desseins publics ou priuez, que les citoyēs & habitās desdites villes soient pour s'y laisser circonuenir. C'est pour quoy ie leur ay par aduance ordonné de se bien garder, & de ne donner entrée en leursdictes villes à personne puissante assez pour s'en emparer, & leur donner la loy, Car le Roy

mondict sieur & fils, & moy, ne pretendons pouruoir à leur seureté, que par l'entiere confiance & assurance que nous auons de leur loyauté. La charge que i'ay m'a obligé à vser de ceste precaution contre les mouuemens qui fretilent. Laquelle ie m'assure, mon Nepueu, que vous approuuerez, Car elle est faicte, non pour nuire à personne, mais pour garantir d'iniure & d'oppression ceux ausquels ie dois protection? Mais pourquoy me recommandez vous par vostredite lettre, le retour du Cheualier de Vendosme aupres du Roy, puisque c'est chose que vous scauez que i'ay ordonné il y a plusieurs mois, il n'a esté retardé que pour le rendre porteur de l'obedience qu'il faut que le Roy ren le à nostre S. Pere le Pape, & au saint siege deüie à cause de son aduenement à la Couronne: Preendez vous quelque aduantage de son retour, & de sa presence aupres du Roy, ou si c'est par pure charité & affection que vous faictes ceste instance. Vous scauez que ie scay quels ont esté, & iusques où peuuent encores s'estendre les cōteils & proiects des principaux autheurs de nos diuisions. Je ne m'expliqueray pas plus auant, Il suffit que i'aye recogneu & eprouué la portée de leur conscience. Or mon Nepueu, pour finir & cōclure la presente, ie vous presenteray de nouveau, par forme de repetition, que pour veritablement faire cesser les desordres & excez, que vous pretendez auoir cours en ce Royaume, Il faut faire tout le contraire de ce que vous faites. Premieremēt, vous ne deuez vous tenir esloigné du Roy, ny de moy, comme vous faites, ains nous satisfier au plustost de vostre assistance, avec laquelle nous pouuons facilement pouruoir à toutes choses necessaires pour le bien de tous: Secondement, Vous ne deuez autoriser de vostre nom vne diuision entre les Princes, Seigneurs, & maisons Catholiques du



Royaume, laquelle a esté indubitablement forgée par tels, qui peut estre n'esperent pas moins en profiter quelque iour à vostre propre dommage qu'au mien: Finablement, vous deuez vous abstenir de blâmer publicquement comme vous faites, le gouvernement des affaires, & les Officiers qui y seruent, mesmes deuant que de vous en estre adressé à moy en particulier: Mais chacun ne cognoist que trop clairement aussi, que vous vous adressez à moy plustost qu'à eux. Pareillement vous ne deuez permettre estre dressé des partis dedâs l'Estat, y estre semé des schismes, diuisions, & detractions, le gouvernement descrié, que l'on se plaigne des grâces que i'ay faites, qui sont appellees maintenant prodigalitez, par ceux qui en ont recueilly & employé le fruct à leur aduantage, estre donné attainte à la paix publique, sagement & heureusement maintenue depuis quatre ans, contre les diuers assauts & artifices employez pour la renuerser, exciter & emouuoir le Clergé & la Noblesse, avec les habitants des villes, & le peuple, mesmes les compagnies souveraines, & tous les Officiers à mescontentement. Vouloir expres retarder les mariages cōtractez, pour après les renuerser avec la paix de la Chrestienté, après auoir esté approuuez par vous, & en auoir vous mesmes signé les contracts, ny permettre aussi en estre donné ialousie aux sujets du Roy, & a nos voisins, & faire celer expres à mesme fin le mariage qui se traicte en Angleterre: Bref, interpreter à mal tout ce qui a esté fait, & qui a neantmoins heureusement succédé au bien & aduantage des affaires du Roy, dedans & dehors le Royaume, depuis le trespas du feu Roy, mondict Seigneur: Car faire toutes ces choses, & les accompagner encores de toutes sortes de pratiques, enrouillemens de gés de guerre, & recherche d'estrangers, Il

faut que ie vous die, avec la mesme liberte que vous m'avez escrit, & adresse vostre dicte lettre, & l'avez depuis semée & respandue par tout, que ce n'est le droit chemin qu'il faut tenir pour veritablement reformer l'Estat par moyens legitimes comme vous le protestez, Et demander encores, en suite de cela, vne assemblée conditionnée de seureté & de liberte, c'est à dire, à la mode & au goust de ceux qui vous donnent tels conseils, qui, peut estre, ont dès à present pour but (sous pretexte de ceste pretendue seureté, & liberte) d'en renuerfer, & empescher du tout l'effect, comme ie vous ay cy deuant dict, par ou il semble que l'on n'ait autre visée que d'esblouyr les yeux d'un chacun par la proposition de ladicte assemblée, pour faire croire que ie l'apprehende avec ceux qui seruent le Roy, aupres de moy, & neantmoins nous la desirons plus que tous, & espere que nous en profiterons aussi pour le bien & le service du Roy, & du Royaume, plus que tous. Au moien de quoy, mon Nepueu, si vous voulez que le Roy, & moy, & tous les bons seruiteurs, & subiects, croyons que vous aspirez veritablement à la susdite reformation, par bons & legitimes moyens, & en intention de bienfaire. Changez ie vous prie, vostre conduite & procedure, car indubitablement celle que vous avez choisie, avancera, & augmentera plustost la confusion, & les desordres, qu'elle ne les retrachera, à la desolation generale du Royaume, & partant à vostre desavantage, comme au nostre, & reuenez nous trouuer avec ceux qui sont conioincts avec vous en ce project, Vous & eux y serez receuz avec honneur & confiance, faisans cesser par effect toutes sortes de menées & pratiques qui ont cours par les Provinces du Royaume, & au dehors, que personne n'entre en doute des armes du Roy, car elles serot employées à la



deffence commune & indifferente de tous. Aduãçons en diligence, & attendons avec patience, le succez de ladite assëblee generale des Estats du Royaume, s'il y a du mal au maniement des affaires publiques, & de l'excez de pouuoir en ceux qui les maniēt (jaçoit que ie ne me sois aperçüe qu'il en ayt este abuse) i'y remedieray avec vo<sup>r</sup>. Partant ie vous conuie de rechef, & coniure par l'interest que vous auez au bien de ce Royaume, de vous rendre aupres du Roy au plustost & deuant que les maux (qu'engendre vostre esloignement, & le chemin que vous auez ouuert) prennent plus profõde racine, vous y trouuerez la place qui vous y est deüe, elle vous est reservee entiere avec soin & affection, par le Roy, mondit sieur, & fils, cõme par moy, Il est graces à Dieu doüe d'un esprit & naturel plein de benignite & de vigueur, Il est nourry & esleue en la crainte de Dieu, & à discerner & recognoistre ceux qui l'affectionnent à la proportiõ de leurs qualitez, merites & seruices, le vous promets qu'il vo<sup>r</sup> cherira comme vostre sang, veut qu'il face, & ie remedieray facilement avec vous aux pretenduës inegalitez & differences que vous dictes apparoir en ces deportemens: En fin ie continueray à contribuer de mon coste les offices & enseignemens qui dependent de moy, tant enuers luy, qu'ailleurs, pour vous donner tout sujet de vous louer de ma bien-veillãce, & à tous les autres, de ma conduite en toutes choses, A tãt ie prie Dieu, mon Nepueu qu'il vous ayt en sa saincte & digne garde. Escrit à Paris le vingt-septiesime iour de Feburier 1614.

*Vostre plus affectionnée Tan*

M A R I E.

*[The text on this page is extremely faint and illegible due to fading and bleed-through from the reverse side. It appears to be a continuous block of text, possibly a letter or a chapter section, written in a cursive or semi-cursive hand.]*

















